



II d. 72 405/a

Cim


G

1548



4055

CIMELIA



Cim. Bx. 4055.

II. d. 72.

2 f. 50.

1874. XII. 80.

**HISTORIA FV
NEBRIS IN OBITU DIVI SIGIS-**
mundi Sarmatiarum Regis. & ad Sigismundum Au-
gustum filium admonitio. Authore Petro
(Royzio Maureo Hispano Celubero.



Biblioteka Jagiellońska.



II. d. 72.

Regem hominum amisi inſœlix regina uolucrum :
Perpetuo planctu qui mihi flendus erit.
Hei mihi ſed non eſt clangor lugentibus aptus ?
Flebilibus non uox conuenit iſta modis ?
Mutemus : Regem ut dominum mœſtiſſima plangā :
En Sceptrum : luſtus da mihi Cycne tuos.

AD LECTOREM.

Mœsta Sigismundo cantatur nenia Regi:
Funebrem Lector hic legis historiam.
Vt moriens terras, homines, sceptrumq; reliquit:
Atq; ima ascendens astra petiuit humo.
De uita nonnulla leges: queis scribere plura
Si potui Lector: omnia non potui.



Pexye N° 2099

HISTORIA FVNEBRIS IN OBITU
Dñi Sigismūdi Sarmatiarū Regis. & ad Sigismundum
Augustū filiū admonitio. Authore Petro Royzio
Maureo Hispano celtibero.,.

Q Vis cœlo gemitus flentum? quis luctus ad auras?
Cracouia in magna, ciues, quæ funera cerno?
Fata Sigismundum Regem, crudelia fata
Inuidere orbi, & sublatum morte tulere.
Viuerè dignum olim, terris si fata dedissent,
Rege orbata suo miscentur mœnia Gracchi:
Et grauidus lachrymis ingens ferit æthera planctus.
Rege orbata suo cœlum Bona quæstibus implet
Coniunx, heu iam non coniunx, spoliata marito
In uiduis plangens stratis, fecat unguibus ora:
Ora, genasq; ambas, & rumpit pectora pugnīs.
Dilaniatq; comam incusans hominesq; Deosq;
Et quæ non? cœlum ne quicquam accusat & astra.
Ingeminant natæ planctus, charissima matris
Pignora, deliciæq; patris, dum uita manebat.
Amisum patrem, tria uirginis ora dianæ
Hinc Sophia, inde sequens æuo, haud uirtutibus Anna;
Vltimus & partus magnæ Catharina parentis.
Tres natæ lugent: lamentisq; atria complent.
Ora madent: lachrymæq; genis uoluuntur obortæ,
Luminæq; iratos poterant quæ flectere diuos:
Quæque uelut stellæ uultu emicuere sereno:
Ploratu multo & lachrymarum flumine turgēt.
Fama mali tanti paulatim it sparsa per urbes:

Sarmaticos & agros, & luctibus omnia miscet.
Purpura lugubri passim mutatur amictu :
Atq; pice infectum tyrio pro murice uellus
Succedit, lanæq; rudes, atq; aspera lina :
Quæ nullos soles, quæ nulla hausere fluenta.
Gēma procul, procul omnis Onyx, uiridesq; Smaragdī :
Infractusq; Adamas, & cedere uiribus ullis
Nescius:ingeminansq; ignes ceu flamma Pyropus.
Et fuluo quondam quicquid concluditur auro.
Non digitos uinclo fulgens premit annulus arcto :
Non collo torques pendent : textæue corollæ
Flauentes strinxere comas, non uertice cristæ
Exultant conicq; uagi : non ulla iuuentæ
Apparent decora : est uultus toto æger in orbe
Sarmatico : in tanto & facies tristissima luctu.
Flet plebs : flet ciuis : flet eques : flet & ipse senatus,
Flet Regina uirum : flet castus præsul ad aras.
Omnia sunt luctus : lachrymæ undiq;, & undiq; plâctus.
It flentum late cœlo illætabile murmur.
Fletus ubiq; sonat : luctusq; auditur ubiq;.
Ast, Auguste, tuas nondum uox tristis ad aures,
Nunciaq; extincti peruenit fama parentis :
Longinquum te alio Lithuania submouet orbe :
Ignorare diu sed te tua uulnera præsul
Haud passus pius, extincti tibi funera patris
Qui referat, lachrymisq; madens ægerq; dolore
Vix fatus Samuel, cursu iubet ire citato.
Nuncius is : mæsti fers & solatia casus,
Prærembi, primis quem uirtus extulit annis :

Ante

Ante pilos & quæ uenit prudentia præcox.

Cassum anima multo interea lauat imbre cadauer :
Persoluitq; pio Regi decora ultima uitæ
Præsul : & Augusto sacras de more lacernas,
Arte laboratas uestes, auroq; rigentes
Inducit : sceptrum dextræ, læuq; inserit orbem :
Et capiti imponit Regnorum insigne coronam.
Accingitq; latus, quondam ceu uiueret, armis :
Exanimes artus, stimulisq; armauit acutis,
Calcem utrumq; aptans : diuisq; in uota uocatis.
Æterna corpus Regale recondit in urna.

Tandem, Auguste, tu as percellit nuncius aures :
Iam tua lamentis impletur Regia : Regem
Rex luges, patrisq; absens flet funera natus.
Vilna omnis tecum, atq; omnis Lithuania tecum,
In lachrymas it fusa, cietq; ululatibus auras.

Nec uos, Pannonico quarum altera uiuit in orbe :
Altera Theutonico, iam matres, altera Regis,
Principis hæc magni coniunx, in patris amati
Funere prolatu mæstæ parcetis acerbo :
Cum cecidisse senem ad uestras peruenerit aures.

Quo tu Alberte nepos luctu, quo funera uultu
Audita accipies ? & auunculus occidit, & Rex,
Dux Alberte tuus, per quem tibi sceptræ relicta,
Imperiumq; tenes Pruteno ductor in orbe :
Paceq; perpetua frueris, uicina tot inter
Bella, tot insano surgenti in prælia Marte.

Vosq; Duces, late seruit queis Theutonibus ora,
Hospicio Regi longeuo, & fœdere iuncti

Aij

Coniugij,

Coniugij, quibus ipse suas sociare sorores :
Dignatus, magnos dat lagellonis honores.

Nec te transferim Cæsar, fratremq; Quirinum:
Arma exultantes inter, totq; undiq; bella,
Victores ambos, dignos successibus ambos.
Sanctum flete senem, lachrymis nec parcite obortis :
Vos dolor hic tangit, Rex sanguis uester obiuit :
Austriaca de matre genus qui ducit auitum,
Vestraq; qui, quicquid uictricia signa tulere,
Pectore lætatus toto est : uicisset ut ipse :
Albentemq; aquilam uicto retulisset ab hoste.
Contra si quando rumor malus attulit hostis
Successus uestri : noctes uigilauit amaras :
Insomnisq; iterum candentem uidit Olympum.
Ergo senem mœsti fratres ploretis amicum.

Quin Reges omnes, solio qui insiditis alto,
Sanctum flete senem : quo Regia sceptræ Magistro
Sustentastis adhuc : hic uestris regula Regnis,
Atq; orbi fuit : horrendo seu uertere bello
Hostiles acies, sedit : seu regna paterna
Imperio regere, & moderari legibus æquis :
Perpetua & populos in pace tenere uolentes.
Seu promissa fides, percussaq; fœdera quondam
Pacifica seruanda manu : & rata dicta tuenda.
Ore suos sensus parco mentemq; resoluit :
Oraculum tanquam cœlo uenisset ab alto :
Verba sonis fuerant : nullis obnoxia dictis,
Ancipites lites, perplexaq; soluere iura
Promptus, & ambiguos causis distinguere sensus,

Inson

Inson non illo damnatus iudice fleuit.
Iustitiæ cultor, sed & idem parcere fuetus :
Scilicet in ueniam procliuior, illius unum.
Hoc uitium, in fontes paulo clementior æquo.
Nostra pium magis hoc, uidit nil sanctius ætas :
In terris uixit, superos ceu uiueret inter
Coelitibus similis : non ulli noxius unquam :
Vtilis at multis, diuum haud neglexit honores
Multa sed exsecro construxit marmore phana
Seruatori hominum, sublimibus edita tectis :
Regis opus : diuis sacras erexit & aras :
Et statuas posuit : spirantia dixeris æra.
Turrigerasq; bonus, quas hosti opponeret, arces
Eduxit coelo : medijsq; in nubibus egit.

Iamq; dies aderat, manes inferre sepulchro :
Æternamq; urnæ sedem dare : & æthere casso :
Luna quater coelo caput occultarat honestum :
Sancti post obitus Regis : rediuiuacq; fulsit
Orbe quater pleno, tunc nota ad mœnia Gracchi
(Rex ubi lætum obiens, supremacq; funera uidit :
Et iacet exanimis multo cantatus honore)
Conuenere omnes : heu mœsta ad mœnia Gracchi,
Huc populus late circumfluit undiq; : & omnis
Regis ad inferias pullata Polonia uenit.
Hic Lithuanus adest : hic omnis Russia : & armis
Questæ gentes, deuictaq; Prussia bello,
Victoris spectare obitus, & tristia iusta
Mœrentes iuuat, & lachrimis decorare sepulchrum

Clementis

Clementis Regis : cuius mitissima semper
Imperia experti, sæui non ora Tyranni,
Exanimem lugent, plorant, Regemq; patremq;
Amisisse omnes : tales urbs mæsta querelas,
Turbacq; plangentum fundit : mistiq; Polonis
Externi populi gemitus ad sydera iactant.

Multi oratores uarijs ex partibus orbis
Aduenere, ferant cineri qui extrema beato .

Tu Gulielme uenis a magno Cæsare missus :
Illo fortunæ domino, bellicq; potenti,
Illustri Gulielme : dapes cui munus auitum,
Augustas præferre : sacrisq; imponere mensis.
Pars idem magni arcani, & non ultimus aulae
Cæsareæ, pietas quem tollit & aurea uirtus.

Malzanus, Fernande iubes Rex magne Quiritum,
Inferias pro te dilecti Regis honoret,

Ad tumulum chari misso oratore parentis
Pannoniæ Regina suum testata dolorem est.

Et tu Romulei- tu pars Otho magna senatus :
Cardineus quem tollit apex : Augustaq; iactat
Pontificem : patrum uestigia nota tenentem
Præscorum : magniq; tuentem iura Quirini.
Deploraturum misisti ad funera Ræmum :
Funera, Regis : erat (si quis pius) illius : unus
Qui casta diuos in relligione colebat :
Nullis inde hominum depulsus uiribus olim,
In numerum dignus referat quem Roma piorum :
Defunctoq; aræ meritos decernat honores,
Aduenere alij, claris gens Regibus orta,

Regales

Regales iuuat inferias quos cernere coram.

Non Albertus abest (quo se duce Prussia iactat)
Qui consanguinei deploret funera Regis.

Marchio uon alter : quem Brandenburgia tellus
Tot uictis ducibus, populis tot Marte subactis :
Ingentem Carolo gaudet peperisse triumphum:
Subq; iugum dextra gentem misisse rebellem.

Landgravius comes huic Leuthenburgæus adhesit :
Cæsaris arma quoq; & uictricia signa secutus :
Exultans nuper media inter prælia uictor :
Flet magni Regis lachrymis nunc funus obortis

Dux Venceslaus non iustis defuit istis :
Dux Tessine tuus: Regum generosa propago:
Reliquiæ clara ueteris de gente piasti:
Mansuetus, pius & clemens, mitissimus heros :
Esse decet qualem Regali a stirpe profectum :
Dignus auo, & quondam moderanda ad sceptrâ uocari.

Cultus ubiq; dies matri sacer annuus Annæ
Fulserat : inferijs dictus moestissimus ille,
Ille dies : celsam cum magni Regis ad aulam
Turmatim pleniscq; uis inde itur & inde,
Regia lamentis ululatuq; excita tristi
Auditur late : moestiq; ad sydera cantus
Pontificum, coetusq; sacri : qui plurimus ante
Stat Regem exanimem tecti in penetralibus altis.

Ecce autem multa hic consumpta parte diei,
Flendo, torquendo & miseros singultibus artus :
Lugubre Regali funus procedit ab aula :
Multi quod populi comitantur & agmina late.

B

Stamine

Stamine strata uia est nigranti, & uellere pulso.
Pontificum hic ordo multis cum millibus ibat.
Præbyterum, generisque sacri : lachrymasque canendo
Miscebant hymnis : ingrataque funera flebant.

Ante omnes Samuel, Gracchi iustissimus urbis
Antistes : Samuel fletu rigat ora profuso :
Regis & annosi fatum ceu plorat acerbum :
Illum ut dilexit quondam, dilectus ab illo.

Turba deinde inopum sequitur : bis mille ferebant
Hinc atque inde faces : nigrans pice uisitur agmen :
At flammis superant fulgentis lampada phœbi.

Hic uexilla sinus pandunt : quæ plurima bello
Assueti præferre duces, & tendere dextra :
Arma olim cum Rex inimicum ferret in hostem :
Terdeni gessere uiri : lectissima corda
Triginta post deinde auro uestita feretra.

Hic cataphrattus, eques grauius circumdatus armis
Tarlo, bonus bello, & magnis uir strenuus ausis.
Dextra ens uerso in terram mucrone ferebat.
Pone subit iuuenis : scutum qui portat & hastam
Obuerso in terram ferro, tristissima uterque
Fata Sigismundi signant : cum uita manebat,
Assueti non hac specie ferre arma : uirosque
Surgere in aduersos : inimicisque fundere castra.

Post hos ibat eques Regali indutus amictu :
Ordo quem procerum sequitur : magnusque senatus.

Quattuor hic patriæ de more insignia Regni
Sauromatum primi portant : ille optimus armis,
Ille animisque ingens, belloque imperdita uirtus

Tarnouia.

Tarnouius, Regni præfert insigne coronam.
Cmithaq; magnanimus sceptrum, fortissimus heros,
Se se ausis tollens, & cædere nescius ulli.
Orbem auro grauidum Tencinius ille seuerus
Ora senex, & consilijs non ultimus author.
Fert gladium Volsus florens cultusq; iuuenta.

Triste deinde urbi fertur lachrymabile funus :
Extincti Regis cineres, & flebilis urna.
Centum humero obnixa heroes subiere feretrum :
Mille faces circum (quas fert attrata iuuentus)
Hinc atq; inde micant, Rex hic moestissimus iba.
Augustus : patrisq; idem de nomine dictus
Rore Sigismundus sacro dum tingitur infans.
Tristia fata patris lachrymis uelut imbre uolutis
Ora per atq; genas queritur : plangitq; querendo :
Pectoraq; assiduus quassat singultibus ægra.
Pone subit Bona Sforciadum gens : indeq; natæ :
Hæc orbata uirum, patris ille funus amati
Ingenti lugent planctu, lachrymisq; sequuntur
Virgineus chorus has comitatur & agmina matrum.
Postremo ciues subeunt, urbisq; Senatus,
Hoc uicina adeunt facto ordine templa deorum :
Sauromatum cineres mos est ubi condere Regum.
Non capiant delubra omnes licet ampla : nec ingens
Area quæ contra est : non & uicinia tota.
Ergo pars templum ingreditur : consistere circum]
Pars iussa est : magnæq; sacrorum cædere pompæ.
Ante aras ingens moesti posuere feretrum :
Quod sanctos claudit cineres ; insignia Regni

B n Quo

Quo super imponunt : gladiumq; orbemq; coronāq;
Et sceptrum procures : hinc cætera & inde feretra.
Hic Rex Augustus folio confidit in imo :
Inde Bona, hinc natæ : circum populufq; patrefq;
Cum lachrymifq; preces fundunt: diuofq; precantur :
Iuftam animam coelo accipiant, dentq; æthere lifti.
Æternumq; altis agitare in fedibus ænum.
Idem omnes, plebs hoc populufq; patrefq; fremebant:
Et sacer anſanctas chorus hoc poſcebat ad aras:
Pontifices, caſtiq; omnes ex ordine patres.

Tempus erat trifti cineres inferre ſepulchro :
Regales cineres, & manes condere terra.
Ingratum tollunt ergo lachrymando feretrum
Sauromatum primi : Rex & qua conditur urnam
Deuoluunt foſſam demiffo fune ſub imam.

Hic maior populi fletus, maiorq; frementum
Exoritur clamor : quaſi nunc cecidiſſet amatus
Sauromatum pater & princeps : non ante periſſet
Caſſum anima cum mors frigentem liquerat atrox.
Templum ergo gemitu compleri ; omnemq; uideres
Gracchi urbem fremere : & triftes coelo addere uoces.
Quales, captiua ſæuit cum miles in urbe,
Eduntur fremitus: ferturq; ululatus ad auras.
Vertitur interea coelum: & nox incubat atra:
Veſpereq; immiſo tenebris inuoluitur æther.

Poſtera cum lucem terris aurora reduxit :
It Gracchi moeſtam funebris pompa per urbem :
Heſterno uelut ante die, moeſtiſſima pompa.
Lugentesq; ferunt uacuum per templa feretrum :

Inferiaſq;

Inferiasq; canunt Regi, lugubreq; carmen.
Pulsa sonant campana altis in turribus æra :
Ingeminantq; urbis luctum, cœlumq; remugit :
Et crebris ictus resonat tinnitibus æther.

Pontifices passim faciunt per templa Deorum
Sacra : Leonardus canit hic : Droieuius illic :
Doctrina hic præstans : pietate & moribus ille :
Cultor iustitiæ ac obseruantissimus æqui,
Chelma tuus præsul dignus maiore tiara.

Iaducius sacras Annæ cantabat ad aras :
Iaducius doctus perplexas soluere lites :
Atq; foro cohibere homines, & lege Quiritum
Optimus : inferior prisco non ille Lycurgo :
Non pandionio, celebrat quem fama, Dracene.
Ad Stephani tu Noscoui, quo Plosca beata est
Præsule : nec sentit Samuelem nuper ademptum :
Sic quoq; tu mitis, bonus es, mansuetus & æquus.

Virginis ad Mariæ dictis Isdbennius acer :
Templorum uindex & religionis auitæ :
Sacra canit, Regiq; Deos exorat amicos.

Ipse Dei ad trini præsul Zebridouius aras
Sacra facit : bonus ingenio, linguaq; disertus :
Et magni præstans inter consulta senatus.

Interea delubra Deum funebris obibat
Pompa : precesq; orans alto fundebat Olympo
Rex, proceresq; omnes, lachrymisq; urbs tota profusis.
Illo templa die cecinerunt flebile carmen
Solis ad occasum : soluitq; elegia crinem.

Tercia lux finem inferijs iustisq; datura

Fulserat : & cœlo steterat sol arduus alto.
Conueniunt ad templa omnes, populuscq; patresq;
Rexq; madens lachrymis: huc Regia fluxerat omnis,
Sacra facit diuosq; orat Nicolaus ad aras
Gnezna tuus præsul, quem Sarmatis ora magistrum
Supremum accepit : solioq; insidere iussit
Pontifices supra, templisq; præesse deorum,
Defuncto ueniam Regi pacemq; rogabat,
Æternam & nullo perituram tempore uitam .
Surgis tu Samuel inter sacra (magne sacerdos,
Gentis honor patriæ, & decus immortale tuorum :
Maeste pia Samuel Diuum uirtute) toroq;
Vnde docere soles populos, exorsus ab alto
Dñs dignam Regis uitam, cœloq; renarras :
Quam pius ille, bonusq; fuit : quam iustus & æquus :
Mitis, mansuetus, quam non iniurius ulli.
Quam belli exosor fuerat, quam pacis amicus.
Deniq; uiuus adhuc supero quam dignus Olympo :
Quem pedibus nunc calcat ouans : æternacq; carpens
Gaudia cœlestes inter stat in arce uolucres,
Luce refers illa, uicto qua Christus ab orco
Surrexit, uite defunctum munere Regem.
Et comitem Christi terras liquisse iacentes.
Inde cies lachrymas, cum mortem & funera narras,
Lætitiâ hinc, cœli memoras cum gaudia læta.
Sacri finis erat: patri & missa hostia magno,
Hic cataphrattus Eques (talem solennia Regum
Iusta ferunt finem) magno cadit ante feretrum
Impete : fusus humi præsentat funera Regis.

Inde

Inde bonus galeam gentis de more paternam
Augustus iacit ante aras : iaciendoq; plangit
Extremos obitus, & chari funera patris.
Scutum hic in terram, gladium iacit ille coruscum :
Longam alius magnis infringit uiribus hastam :
Tela, quibus quondam medios tendebat in hostes
Marte Sigismundus foelix, & maximus armis.

Hic mox deinde fudes aulae fregere Magistri :
Imperio uelut amisso, non ordine certo
Ire iubere homines, famulasq; incedere turbas
Dein fore ius illis, simul hic & publica signa
Franguntur : ferroq; excissa recedit imago
Regalis gemmae : qua Rex mandata solebat
Signare, & penitus subiectas cudere ceras.

Hic Rex (restituens tanquam retro omnia) Regni
Vexillum inprimis, quod summa infigitur hasta,
Extollit terra : mediasq; extendit in auras :
Victores signans superesse, & robora belli :
Signa olim & possint qui inferre, & tendere dextra :
Fortiter & patrijs depellere finibus hostem.
Sustulit & sceptrum, Regniq; insignia terra
Caetera : quae dextra patribus dein porrigit ultro.
In se stare situm signans tibi Sarmata Regnum :
Patre Sigismundo non interisse perempto.
Restat adhuc alter : solio qui insidat in alto :
Et populos post hac moderetur legibus æquis.
Atq; alia hic Regni profert Rex publica signa.
Porrexit magno Samueli hæc : illa fideli
Dat Grabiaë : uice qui Samuelis munus obiret.

Inde

Inde fudes alias aulae retulere magistri.
Hic finem accepit Regis lachrymabile funus :
Tristesq; inferiae, flentes sua quisque petebant,
Ille urbem, iustis repedit rus ille peractis :
Mœsti omnes, tristi uolentes pectore curas.
Rege Sigismundo populorum patre perempto.
Sed superas, Auguste, patrisq; & Regis imago :
Rex natusq; idem : sceptriq; & nominis hæres.
Te desyderium regnando extinguere patris
Conuenit : & meminisse olim uirtutis auitæ.
Ne te poeniteat nostrum percurrere carmen,
Qualiacunq; fero, uatemq; audire monentem.
Verum semper ama iustis monitoribus æquus,
Solis claude tuas assentatoribus aures :
Pestis enim Regum est certa & loetale uenenum
Blandus adulator, uita, suspectaq; uerba
Semper habe lita melle : latent aconita sub illis;
Aspera sæpe iuuant : aures Auguste patentes
Consilijs præbe : non bissus & aurea torques
Commendent tibi dicta : micans uel in indice gemma.
Sæpe etenim sapit & uulgus : nec inutile suasit
In tenui tolerat qui iras Aquilonis amictu.
Ergo tuæ quæ sunt partes Auguste memento,
Atq; animum regno moderando intende paterno.
Prima tibi fidei sit cura : sit altera legum :
Tertia militiæ, diuos sic ipse fauentes,
Sauromatasq; tuos pace experieris & armis :
Armatosq; tuas aquilas trepidauerit hostis.
Omnia succedent : casusq; euaseris omnes

Fortunæ:

Fortunæ : quicunq; manent, dijs usus amicis.
Macte animis ergo Rex res accingere ad istas :
Religio neglecta uides ut sacra, Deiq;
Omnis honor iacet: ut squalent altaria multo
Plena situ, cœliq; decus morituraq; nunquam
Gloria diuorum ueteres iam nescit honores.
Quisq; suos intus in ritus : non sua uulgus
Dogmata confingit, colit hic, quod despicit ille.
Ille suos, trahit ille suos : diuersa sequuti
Scindimur : & Christum non iisdem legibus unum
Diuersi accipimus : uarijsq; erroribus acti
Damnamus, laudamus amat sua uulgus, & errat.
Nulla sacerdoti reuerentia : non metus ullus
Pontificem agnoscit : qua quisq; libidine raptus
Fertur, it huc præceps : impuneq; sacra fatigat.
Deuotusq; olim, credit ludibria diras.
Redde Deo meritos, quos abstulit error, honores:
Dissectæq; urbes turbant, & mobile sæclum,
Quale decus templis, cum Petrus Bariona quondam
Cum socijs, raptusq; astris claræ incola Tharsi
Commissos Christi populos in pace regebant :
Tale Auguste tui uideant te Rege Poloni :
Non tua Pontificum partes manus occupet, opto :
Crudeles in te diuum ne exciueris iras :
Ausus ut Oza olim labentem feruidus arcam
Attrectare manu, & se se immiscere negatis :
Non tibi, non o Rex ueuiat tam dira cupido:
Iustum quin potius clypeo tuearis & armis
Pontificem : templis morem sine ponat & aris

Ille uoluntatem Diuorum edisserat : ille
Afflatus coelo discernat sacra profanis.
Illud cum populo patribusq;, Auguste, sequaris :
Quod sanctum uocat hic: quod nō, hoc crede profanū.
Pontifici ius est ritus indicare templis :
Tutari tibi : contemptum nec ferre sacrorum.
Pontificis spernit qui mitia iussa, furem
Vindictis ille manum Regis, formidet & irā.
Qui temnit patrem coeliq; erebique potentem :
Cui sedes aperire datum est, & claudere Diuum.
Atq; leues animas in Ditia mittere Regna :
Arbitrijsq; suis inferre potentibus æthræ.
Soluere cui quondam ius est, &nectere uincla :
Æternis nullo soluendis robore nodis.
Deniq; cui coelum domino, cui tartara parent :
Humana non ui, sed uoce iubentis lesu.
Hunc qui contemnunt, & iussa capeffere mussant :
Ausu quin etiam ceruicem attollere contra,
Castiga, pœnisq; aspris, & lege coerce :
Iura Dei tutare : tuos sons imbuat enses.
Hoc incumbere in opus : Dñs Rex uteris amicis.
Proxima iustitiæ cura est : quæ maxima cura
Sit tua Rex : etenim Regno quid pulchrius illo ?
Fert ubi quisq; suum : non hic rapit illius, ille
Non rapit huius opes, rebus contentus auitis
Et iustis parto studijs, ubi lædere quemquam,
Grande nephas : ferroq; manus armare nocenti
In caput alterius: struere aut peioribus ausis
Insidias, & fraude malos meditariet astus :

Inuisum

Inuisum. populus patres ubi pronus honorat :
 Plebs ciuem : Regemq; omnes, ubi uincit honestum
 Commoda : turpis ubi lucri damnata cupido est.
 Crimen ubi fraudi est : & habet sua præmia uirtus :
 Et dignos manet altus honos. fontesq; seuerum,
 Supplicium. poenarq; graues. & tristia fata.
 Nec spes ulla datur leges uiolare precando :
 Sordibus aut meritas precioq; euadere poenas :
 Non minus hic. humeros onerat qui torquibus aureis;
 Ostentatq; suos. & imagine gaudet auroꝝ :
 Sons horret fasces. & turbida iudicis ora :
 Quam pauper. presso & terram qui uersat aratro :
 Assuetus uitam duro tolerare labore.
 Iustitiæ hoc studium præstat. iurisq; seueri :
 Hoc incumbere in opus. Rex. hæc tuâ proxima cura est .
 Rex datus es populis. multis Rex urbibus unus :
 Intentas in te mentes atq; ora tenere
 Crede omnes : te ut spes cunctorum est omnis in uno.
 Diues opes gazamq; suam. sua pauper & ipse
 Te custode. tenet foribus securus apertis.
 Ne quicquamq; manum plebs extimet. agra potētū .
 Vim quicumq;. dolosue malos aut cætera passi
 Damna uiri. a te Rex non a latrone repolcant.
 Cunctorum tutela tua est. : tua gloria pax est :
 Fraus omnis. scelus. & quodcunq; impune patratuꝝ
 Culpa tua est : quæ non castigat crimina Princeps :
 Esse facit sua. non solos delicta nocentes
 Distingunt : tangit pars maxima sceptrâ tenentem.
 Nimirum ulcisci deses quæ negligit ille :

Dicere fas erit hæc illo commissa patrono.
Ergo datas Regni dum Rex moderaris habenas,
Pacis amans urge uinclis & carcere fontes ;
Et maiora audens ferro delicta coerce.
Agricola ut quondam manibus sata sedulus inter
Luxurians lolium nocuasq; eruncat auenas :
Ne lætæ noceant segeti, neu noxia terræ
Surgentes campis & tristia farra relinquant.
Liuentemq; unco detruncat uitibus uuam :
Ne trahat attractu uindemia cætera labem.
Sic tu Rex medijs homines ex urbibus arce:
Ocia qui turbant, qui cædibus omnia miscent:
Et gaudent damnis pacemq; odere nocentes.
Iuris item studium & ueterum lege scita sophorum :
Nec graue sit cognosse ; quibus tua Regna iuuari
Experire olim ; multaq; increfcere pace.
Romuleam ut iustis fundaret legibus urbem :
Ad fortes quondam misit Romanus Achiuos
Florentes studijs populos, & pace potentes,
Vnde suis peterent leges, atq; inclyta iura.
Ne te poeniteat magnorum exempla Quiritum
Rex Auguste sequi ; leges si forsan auitas
Non satis esse tuis populis Regnoq; uidebis :
Eia age, quid dubitas, Romani oracula iuris
Addere Sarmaticis ? Graijs quæ ex urbibus olim
Adiecere suis concordēs iura Quirites.
Hæc eadem te Rege ferant Auguste Poloni,
Gens studijs similis, si bello Sarmata gaudet,
Bellatrix quoq; Roma fuit : gens scilicet ipso

Marte

Marte fata : & magni dominator Romulus orbis.
Italia has leges patrīs adiunxit, & omnis
Gallia, pacis amans, has fortis Iberia seruat :
Littore qui extremo solem uidere cadentem .
Has multi tenuere homines, pars maxima mundi,
Se quondam experti non commoda parua sequuta.
Nec uanum audieris tēdentem Rhetora contra
Nescio quem : sacros ausum uiolare Quirites :
Sanctaq; Romani damnare uolumina iuris :
Scilicet ille alio calamos conuertat, & Oestrum :
Ignarus, qua stet melius Respublica lege.

Vltima militiæ cura est (post sacra Deorum,
Iustitiamq; æquis seruata legibus) unum
Hoc tibi restat opus : studijs hærebis in istis.
Cernis ut infenso sed eas circumdatus hoste
Hinc atq; inde, uides odia undiq; : & uudiq; bellum :
Ferro opus est, animisq; , & docta in uulnera dextra.
Ocia tolle tuis : acuas ad prælia pubem.
Exerceq; armis, madidæq; relinquere mensæ
Coge tuos studium : iamq; inde Polona iuuentus
Bellum amet, & sumptis concurrere gaudeat armis.
Turpe putet uinci, pulchrumq; occumbere morti
Pro patria ducat uitam, & pro laude pacisci.
Pulsandumq; manu discat non mœnibus hostem.
Hoc opus, hunc Auguste tuum cognosce laborem :
Non hic te studijs Graiorum accendero & armis :
Non acrem pœnum, aut fortes memorabo Quirites :
Sat pater unus erit : cuius nunc funera flemus,
Ipse tibi fuerit centum pro millibus unus.

Cij Cuius

Cuius & interitu, nisi tu succurris & audes:
Optima Sarmatiæ interijt pars . ergo parentem
Maeste animis Auguste refer : tibi fortia facta
Magni imitanda patris, non nudi nominis hæres
Non Regni datus es, tibi pax, tibi bella colenda,
Relligio tibi: queis studijs clarissimus unus
Ante omnes Reges fuerat pater : illum age genti
Reddas : sic Regna reuocatum ut dicat ab astris
Sarmata, nunc tristis luget quem luce carentem,
Quicq; illo miserum plangens se clamat adempto:
Se fortunatum dicat te Rege Polonus,

EODEM AVTHORE.

Pace Sigismundus Rex, belloq; inclytus olim:
Quo nihil in terris sanctius, occubuit.
Sarmatia, Augustus, Bona lugent : luctus ubiq; est.
Hæc Regem : patrem hic, orba flet illa virum.
Orba virum Bona flet : patrem tu, Auguste, sed ipse
Et patrem populus, quod quoq; ploret ait.
Nanq; vt regnavit, populum moderatus vt ille est:
Non tam Rex, populi quam fuit ille pater.

A L I V D.

Rex ego Sauromatum morior longo oblitus quo:
Occubuisse licet creditus ante diem.
Rexi olim, retuli, colui : Rex, hostis, amicus:
Lege, manu, factis : Regna, trophæa, fidem.
Me extincto ciues lugent : tristantur amici:
Hostes quid & lachrymas non tenuere suas.
Nam quamuis graue sit vinci, at victore benigno
Amisso, causam cur flet hostis habet.

A L I V D.

Vltæ Sigismundum mors abstulit : ille quid ausus ?
Olor erat belli : pacis amicus erat.

Quia

QVIA DIE CHRISTI RE

surrectioni sacro obiit.

Sauromatum Regem rediens styge Christus ab ima,

Vltima cum sancto luxerat hora seni.

Corripuit dextra morientem, atq; intulit astris:

Noluit infernas cerneret ille domos.

A L I V D.

Mole Sigismundus situs est Rex ille sub ista,

Ille suis charus, charior ille Deo.

Exurgens erebo tulit illum Christus: ad astra

Non alio voluit iret vt ille duce,

A L I V D.

Infernas moriens Christus descendit ad vmbas:

Te morientem astris intulit omnipotens.

Spectemus summos si obitus, fatumq; videri

Quam Christus patri charior esse potes.

A L I V D.

Viuo Sigismundus: ne me fle Sarmata, vixi

Ante tibi: nunc post funera viuo mihi.

Viuo Deo: post fata pñ, si viximus vnquam,

Viuimus: illa prior mortua vita fuit.

AD SERENISSIMAM

Bonam consolatorium.

Fles Regem Regina: virum fles optima coniunx:

Regis mors lachrymis, mors quoq; digna viri est.

Rex iustus, vir charus erat: re flendus vtraq;

Rex iustus populo, vir tibi charus obit.

Sed quia pars melior celsi tenet ardua coeli

Spiritus, & diuū gaudia letus habet.

Cum populo Regina simul cape gaudia leta:

Quem luges, coeli gaudia letus agit.

A L I V D.

Pone modum lachrymis Bona: fletu absiste: beatas,

Quem luges, sedes: astraq; celsa tenet.

Gaudia terrarum qui si moritura reliquit:

Gaudia coelorum non peritura capit.

Gaudebas

Gaudebas homines inter quem vivere: quid nunc
Inter coelestes fles habitare deos?

AD INCLYTVM SIGISMVNDVM
Augustum Sarmatiarum Regem Cracouiam
ingressum, Salutatio.

Salue Auguste: valeq; diu: Regnumq; gubernas:
Et Jagellonis esse memento nepos
Esse Sigismundi magni successor: & illud,
Quod magis est, tanti filius esse patris.
Nec matris genus indecorum: seu sforciadum gens,
Seu tibi spectandus sanguis lterus erit.
Hinc Reges Rex, inde Duces Dux cernis auitos:
Quæq; imiteris habes fortia facta virum.
Hæc, dum sceptras tenes, populo & das iura, memento:
Sic patrem æquabis: sic superabis auos.



CRACOVIAE
Apud viduam Floriani Vnglerij.
Anno post Christum natum.
M. D. XLVIII.
Cal: Augustis:

BIBLIOTH. VNI.



JAGELLONICAR

